

Der Prummekuoken

Wat man sech an sunnem Prummekuoken den Magen kann vergellen,
do well ech öch ens jet van vertellen.

Wie ech nöülech ut dem Urloub ben kuomen,
hann ech mer rösteg vürgenohmen:
Bei den Ühm noh Wetzheilen mott ech noch ens hen,
den hatt ech su lang alt nit mieh gesenn.

Et Soterschdahs nom Eten, de Kost koum op,
dätt ech mech aan, dat geng em Galopp.
On wie ech ferdeg stong on woul grad gonn,
do saiht min Frau: „Ech kann dech nit verstonn.

Hengen noh Wetzheilen, dat es doch wiet.
Et der iersch noch nen Prummekuoken on nömm der de Tiet.”
Se hätt mer den Schlips noch jet tereihtsgeröckt.
En der Tiet kann ech mer noch nen Prummekuoken verdröckt.

Min Frau saiht: „Nu mak dech op de Lappen.
Dösen Owend donn ech dir nen nöüen backen!”
Wie ech do geng nom Rüden eren,
es do et Grohen Klär am Fenster.
Dat seht: „Wo wellß du dann hen?

Du kömmß jo aan te marschieren.
Komm eren an denn ens minnen Prummekuoken probieren!”
Ech sag: „Klär, böß doch nit doll.
Ech hann den Magen jo noch kröppevoll.”

Et seht: „Du bruckß doch nit te schenieren.
Du mottß den Prummekuoken lickersch probieren!”
Ech daiht: Gef noh on donn wie de Kluoken.
Do sot ech alt wier hengerm Prummekuoken.

Dann ben ech der Herzbeek erop gegangen.
Den Magen hatt ech beul en der Böxe hangen.
Doch te Böscherhöwen röppt mech einer ut dem Garden.
Es dat doch der Woutersch Artur, nen aulen Kriegskameraden.

„Schön, datt ech dech äwwer noch ens senn.
Du geiß nu ens sier met bei us eren.“
He nohm de Schöppe op den Nacken:
„Prummekuoken hät min Frau gebacken!”

Wir kallden vam Feildtog on van der Schlacht op der Sii.
Wievöll ech gegeten hann, ech weit et nit mieh.
„Su”, sag ech, „nu mott ech äwwer gonn.
Tschüß, Artur, grüß öch, Frau Woulter.”
En minnem Buck geng et houlerdipoulter.

Och", seht die Frau Woulter, „et hät Öch su guot geschmackt.
Ech hann Öch noch en paar Stöcker egepackt.“
Ech saiht dann völmols Dank. Ech muoß ens büs.
On bis nom Ühm wor et noch te wiet.

En Hersched hann ech de Böxe erongerieten,
dat Paket met dem Prummekuoken en de Strücker geschmieten. Schnurstracks dätt ech et op
Krähwenkel aan durch de Ronkeln. Su langsam fong et ouch alt aan te donkeln.

Ech krop, ech koun nit grad mich gonn.
Den Ühm sooch ech alt van wiedem en der Düren stonn.
He riep: „Nu tau dech ens on schmer dir ens de Hacken.
Öm dinnetwellen hät de Tante Prummekuoken gebacken!“

Der Ühm seht: „Du süß ut, äs müöbte baul sterwen.“
Ech saiht: „Och, ech hann et bluß jet op den Nerwen.“
De Tante kiek meck aan on saiht dann:
„De mott ens sier jet Prummekuoken hann!“

Der Ohm seht: Wie süß du bluß ut?“
Der kaul Schwett, de brok mer ut.
Nen Sprong dätt ech en et Gärtschen eren.
Der Ühm kom erut on woul ens noh mer senn.

He seht: „Wat böbte am Stöhnen, wat böbte am Knastern?
Du settß mer jo do en den Wengterastern.“
Ech wor am Pruusten, ech wor am Knöchen.
En Krähwenkel fongen de Höng aan te blöchen.

Ech seiht: „Genaiht Ühm, genaiht Tante. Ech kuom noch ens wier.“
On krieg op der Stroote koum noch de Kiehr.
Ech geng dann eraff durch den Rüdener Grongk,
schlapp wie nen Esel on müöd wie nen Hongk.

Eint noch hann ech ferdegbraiht:
Dem Grohen Klär noch jet op den Dürpel geleiht.
Wie ech heimkom der Trappe erop, röppt min Frau:
„Wat böbte am Gronen, wat böbte am Fluoken?
Häbte Schmaiht? Ongen steiht noch Prummekuoken!“

Prummekuoken! Prummekuoken! Nix äs Prummekuoken!
Ech kann keinen mieh eten!
Daglangk hann ech noch om Hüsken geseten.
Su kann man sech am Prummekuoken verfreten!